

# L'emprim candidat sa preschenta a la publicitad

Davart finamiras, idioms e bellas fluras sin pastgiras d'alp

CUN MARTIN MATHIUET HA DISCURRÌ  
CLAUDIA CADRUVI / ANR

■ **L'emprim candidat per il presidi da la Lia rumantscha è sin il palc. Martin Mathiuet vegn purtà da trais politichers – in politicher naziunal, in chantunal ed in communal.** Martin Candinas, Romedi Arquint e Peider Ganzoni annunzian lur candidat preferì cun ina communicaziun da pressa en sursilvan, ladin e tudestg.

*Tge finamiras avais Vos, sche Vos vegnis elegì sco president da la Lia?*

Martin Mathiuet: Las finamiras ston ins naturalmain discussunar en supranza. Lezza definescha las finamiras. Quai na po betg sulet il president decider.



Quest'atun cumenza Martin Mathiuet sia nova piazza sco maina-scola a Maiavilla. MAD

## Nus stuain guardar per dapli daners

*En la communicaziun da pressa da Voss adherents stat scrit che Vos essas „ina persunalitad franca cun visiuns“. Tge visiuns avais Vos?*

Ina visiun fiss naturalmain da schliar il problem rumantsch grischun u idioms en scola. In'otra visiun fiss da far in nov sforz per obtegnair dapli finanzas, uschia ch'ins pudess engrondir il program d'aziun. Concret: Nus stuain urgentamain guardar per dapli meds finanzials.

*Puncto rumantsch grischun u idioms en scola – nua stais Vos?*

Ils ultims dus onns hai jau empruvà d'empunir differentas opiniuns e da chattar ina soluziun cun la quala omduas partidas possian viver. Mia rolla è stada quella da metter il process sin in binari ch'ins po discurren ensemen. Jau sun persvadì che rumantsch grischun è ina fitg buna chaussa che fa senn da duvra en tscherts lieux, nua ch'i na va betg auter. Ins na po betg scriver sin in pass svizzer tschintg idioms ed anc trais linguas naziunalas. Ils idioms èn naturalmain indispensabels oravant tut en il mintgadi rumantsch en las regiuns. En las regiuns datti anc ina giada ina situaziun pli vasta. A Tujetsch

discurren ins tut auter che a Sumvitg. En la lingua pledada èsi uschia: Pli bleras variantas ch'i dat e pli interesant ch'i vegn. Sco sin ina pastgira d'alp: Pli bleras fluras ch'i ha, pli bella che la pastgira daventa.

## A Tujetsch discurren ins auter che a Sumvitg

*N'ha il rumantsch grischun tenor Voss'opiniun nagin plaz en scola?*

En il model da coesistenza che la Lia less realisar èn prevedidas duas variantas. Tar l'emprim model alfabeteschian ins cun rumantsch grischun a partir da l'emprima classa. En las scolas che sa decidan per il segund model duain ins mussar rumantsch grischun

per ch'ils scolars sappian a la fin da la scola leger e chapir in text en rumantsch grischun. Uschia sco ins dovra paun e latg per viver, dovran ins rumantsch grischun ed ils idioms sco instrument da communicaziun ed infurmaziun.

*Romedi Arquint e Martin Candinas – duas personas che tutgan tar ils cerciels da pro idioms – proponan Vos sco candidat. Sustegnìs Vos pia lur finamiras?*

## I n'era mai mia idea da candidar

Tenor mia opiniun ha pro idioms mess en moviment insatge ch'i n'ha anc mai dà en Rumantschia. Ins è vegnì da mobilisar blera glied ed ha stgaffì ina basa per in'idea. Promover ils idioms n'è betg sulet l'idea da pro idioms. Era blers ch'èn per il rumantsch grischun propageschan ch'i saja da sustegnair ils idioms. Jau sun in che propagescha glietz. I dovra omdas.

*Vos avais menziunà che la Lia sto*

*avoir dapli daners. Per cuntanscher quai dovri in bun fil tar la politica. Il president Vincent Augustin posseda quai. Vos dentant betg.*

Vincent Augustin sesa sez en il cussegl grond. Quai è dad ina vart in grond avantatg, ma po era daventar in dischavantatg: Ins tutga tar ina partida ed ha entras quai adina era adversaris politics. Jau crai ch'jau possedia ina rait che funcziunia bain en l'entira Rumantschia. Jau enconusch relativ bain la scena – tant politica sco socioculturala. Ma igl è cler che quai dat gronda lavur.

*Vos avais ditg giu Vossa piazza sco collavuratur da la Lia e cumanzais il november sco maina-scola a Maiavilla. Avais Vos fatg la midada cun l'intenziun da candidar sco president?*

Jau ma vuleva concentrar plitost sin art e far mez puspè dapli cultura. La dumonda per la candidatura è sa resultada suenter in'intervista cun il Radio rumantsch. Ins m'aveva dumandà pertge ch'jau chal tar la Lia e sch'jau surpiglia il presidi. En l'intervista aveva jau ditg che quai na saja mai stà mia idea. Pauc suenter ch'ins ha emess l'intervista, hai jau survegnì l'emprim telefon cun reacziuns per m'intimar da candidar. Lura èsi i liber.

## «Igl è mal dir ordavant tge che capita»

**Co reageschan ils parsuras da las uniuns regionalas sin la nova? Rino Darms è surprais. Filip Dosch exprima sia vista persunala. E Maria Sedlacek discurre plain precauziun.** «Nus essan surstads. Martin Mathiuet ha ditg giu sia piazza tar la Lia e vul entschaiver ina nova sfida», di Rino Darms. Il co-president da la Surselva Romontscha e la suprastanza eran perquai partids da l'idea che Mathiuet veglia prender cumià da la Lia. Uss vegn la nova da sia candidatura.

La suprastanza da la Surselva Romontscha stettia avant ina nova situaziun e stoppia ponderar co proceder, di Darms. «Nus essan londervi da chattar ora, da tge vart che questa candidatura vegn propi.» Ins veglia savair, tgi che stettia davos las trais personas che lantscheschian Mathiuet.

En sasez n'avevia la Surselva Romontscha betg pli planisà da manar

atras ina radunanza extraordinaria avant l'elecziun dal president da la Lia. Ma la suprastanza vegnia tuttina ponderar, sch'ins na duess betg consultar ils commembers e forsà far ina hearing cun tuts candidats per il presidi. «Avant che giuditgar duvrain nus la paletta da tuttas candidaturas», di Filip Dosch, president da l'Uniun Rumantscha Grischun Central. Ils commembers da sia uniun vegnian ad avoir la pussaivladad da discutir las candidaturas a la radunanza extraordinaria l'entschatta d'october.

Mathiuet saja ina persuna competente cun l'avantag da già avoir lavurà en la Lia, exprima Dosch sia impressiun persunala. In dischavantatg per sia candidatura saja la ferma pretaisa da l'Engiadina da vulair metter il president. Già dapi decennis practitgeschian ins quest «proporz facultativ» a la testa da la Lia. «L'Engiadina metta per ordinari

il president e la Surselva il secretari», di Dosch. Ma il secretari Urs Cadruvi haja gea ragischs en tuttas trais regiuns.

Plinavant saja Mathiuet s'exponì pertutgant il rumantsch grischun en scola. Per tscherts delegads muntia quai in punct negativ, menziuna Dosch. Ma ord vist dal Grischun central na saja quai nagin problem.

Maria Sedlacek, la presidenta dals Grischs, s'exprima plain precauziun. Ella paisa giu mintga pled. L'Uniun dals Grischs haja ils 12 da settember sia radunanza da nominaziun. «Nus da la suprastanza faschain ina proposta per in candidat u ina candidata per il presidi da la Lia.» Quai vegnia a dar ina discussiun.

I na saja per il mument nunpussaveil da dir, sch'i vegnia fatg anc autras propostas e tgi che vegnia insumma tut a la radunanza. «Igl è mal dir ordavant, tge che capita.»